

Poštovane kolegice i kolege, dragi uposlenici Šumarskog fakulteta UNSA,

Ulazeći u drugi mjesec pandemije COVID-19 u našoj zemlji, koristim priliku da Vam se ovim putem obratim, uz želju da Vas i Vaše najmilije ovo pismo zatiče u dobrom zdravlju i dobrom raspoloženju.

Također, koristim priliku da na rođendan našeg grada, našeg Sarajeva, izrazim zadovoljstvo da Vas obavijestim da svi procesi i sve aktivnosti na Šumarskom fakultetu UNSA teku prema planu i programu, a imajući u vidu vanredne okolnosti u kojima smo se svi zajedno zadesili.

Zahvaljujem se na Vašem razumijevanju i pomoći kod organizacije dežurstava i nadam se da će tako ostati u budućnosti.

Posebno želim da se osvrnem na najvažniji segment našeg rada, a to je održavanje nastavnog procesa sa studentima. Nadali smo se da ovo stanje neće potrajati dugo, vjerujući da će se epidemiološka situacijau našoj zemlji popraviti u kratkom vremenskom periodu, te da ćemo se vratiti u učionice i laboratorije za najviše mjesec dana... Ali danas, svjesni situacije u kojoj se nalazimo i da će pandemija sigurno potajati, moramo shvatiti da ćemo najveći dio ovog semestra (ako ne i cijeli) provesti izvodeći nastavu na daljinu. Neki nastavnici i saradnici su se vrlo brzo prilagodili i za njih je online nastava do sada postala rutina, neki se postepeno navikavaju i vjerujem da će tokom ove sedmice svi nastavnici početi koristiti neku od predloženih platformi za online predavanja. Želim istaći da smo danas dobili mail iz „BHTelecoma“ u kojem nas obavještavaju da nam je omogućeno besplatno korištenje Microsoft Office 365 for Education, o čemu ćete biti uskoro detaljno informisani.

Rukovodstvo fakulteta je u svakodnevnim kontaktima sa predstavnicima Asocijacije studenata Šumarskog fakulteta pri čemu zajedno rješavamo aktuelna studentska pitanja, probleme i dileme... Sve aktivnosti vezano za odvijanje nastave su potpuno koordinirane sa Rektoratom UNSA, a tako će biti i u narednom periodu. Već na sljedećoj sjednici Vijeća naše grupacije ćemo postaviti pitanje supstitucije terenske nastave, jer je očigledno da u ovom semestru nećemo moći održati istu u planiranom obimu i sadržaju.

Poštovane kolegice i kolege, iskreno se nadam i vjerujem da ćemo zajedno, kao i uvijek, uspješno izaći iz situacije u kojoj se trenutno nalazimo. Nadam se da ćemo izaći jači, mudriji i bogatiji za jedno novo iskustvo koje nam može samo koristiti u narednim fazama našeg rada i života.

Želim ovom prilikom istaći da rukovodstvo Fakulteta svima Vama, kao i našim studentima, stoji na raspolaganju u punom kapacitetu u bilo koje doba dana i u slučaju bilo kojeg razloga, potrebe ili pitanja... Nemojte se ustručavati da nas kontaktirate!

I na kraju, svima Vama i Vašim porodicama želim puno zdravlja i strpljenja, ostanite kući i poštujujte preporuke nadležnih institucija!

Srdačan pozdrav, Prof. Dr. Mirza Dautbašić, s.r.